

SITI NORMA YAAKOB, Dato' (1940–), Hakim Mahkamah Tinggi wanita yang pertama (1983) dan Hakim Mahkamah Rayuan Malaysia wanita yang pertama (1994). Dia lahir pada 6 Julai 1940 di Seremban, Negeri Sembilan. Dia mendapat pendidikan awal di Sekolah Melayu Rahang (1945–1946) sebelum berpindah ke Convent of the Holy Jesus hingga Tingkatan Lima (1947–1957). Pada tahun 1958, dia bersekolah di King George V, Seremban, Negeri Sembilan. Kemudian dia menyambung pengajiannya dan memperoleh Barrister-at Law dari Gray's Inn, London pada tahun 1962.

Siti Norma menyertai bidang kehakiman dan guaman sebagai Penolong Pendaftar Kanan di Mahkamah Tinggi Kuala Lumpur (1963–1965). Kemudian dia menyandang jawatan Yang Dipertua Mahkamah Sesyen Kuala Lumpur (1966–1968). Pada tahun 1969, dia menjadi Peguam Kanan Persekutuan di Jabatan Peguam Negara. Kemudian dia menjadi Timbalan Pemegang Amanah Raya (1969–1970) dan Penolong Pengarah Kanan (Bahagian Duti Harta Pesaka) di Jabatan Hasil Dalam Negeri (1970–1973). Sekali lagi, dia menyandang jawatan Yang Dipertua Mahkamah Sesyen (1973–1980) dan kemudian Ketua Pendaftar Mahkamah Persekutuan Malaysia (1980–1983). Pada bulan April 1983, Siti Norma dilantik sebagai Hakim Mahkamah Tinggi. Sejak bulan September 1994, dia dilantik sebagai Hakim Mahkamah Rayuan Malaysia.

Selain terlibat secara langsung dalam bidang perundangan dan kehakiman, Siti Norma juga aktif dalam



Siti Norma Yaakob

persatuan terutamanya yang berkaitan dengan perundangan dan kehakiman, dan wanita. Dia menjadi Yang Dipertua Pertubuhan Peguam-Peguam Wanita Malaysia (1975–1977), Ahli Lembaga Pengelola Kolej Tunku Kurshiah (1966–1990), Yang Dipertua Persatuan Pegawai-Pegawai Perkhidmatan Kehakiman dan Perundangan (1979–1981), Naib Yang Dipertua Persatuan Majistret Komanwel (1985–1989) dan setiausaha Persatuan Undang-Undang ASEAN Malaysia (1982–1989). Siti Norma juga berjaya membentangkan kertas kerja dalam bidang perundangan dan kehakiman yang bertajuk “The Disparity between Tradition and the Need for Change Identification and Some Possible Solution to Delay in Case Disposition.”

Siti Norma telah dianugerahi bintang Jasa Setia Mahkota (J.S.M.), 1978; dan Darjah Setia Negeri Sembilan (D.S.N.S.) 1987 yang membawa gelaran Dato'. Dia juga telah dianugerahkan Fellow Kehormat 1988 oleh Institut Kemajuan Wanita Malaysia (IKWAM) dan Eisenhower Exchange Fellow 1990 oleh Eisenhower Exchange Fellowship Inc.